

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

Rješenje

**po zajedničkoj Prijavi koncentracije privrednih subjekata INA- Industrija nafte d.d. Zagreb,
Republika Hrvatska i Prvo Plinarsko Društvo d.o.o. Vukovar, Republika Hrvatska**

**Sarajevo,
septembar, 2018. godine**



Broj: UP-02-26-1-23-6/18
Sarajevo, 18.9.2018.godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16. i 18. Zakona o konkurenciji („Službeni glasnik BiH“, broj 48/05, 76/07 i 80/09), rješavajući po zajedničkoj Prijavi koncentracije podnesenoj od strane privrednih subjekata INA-Industrija nafte d.d. Zagreb, Avenija Većeslava Holjevca 10, 10020 Zagreb, Republika Hrvatska i „Prvo Plinarsko Društvo“ d.o.o. Vukovar, Kardinala Alojzija Stepinca 27, 32000 Vukovar, Republika Hrvatska, zaprimljenoj dana 24.7.2018. godine, pod brojem: UP-02-26-1-23-1/18 na 37. sjednici održanoj dana 18.9.2018.godine, donijelo je

R J E Š E N J E

1. Ocjenjuje se dopuštenom koncentracija koja nastaje na relevantnom tržištu prodaje mineralnog gnojiva na području cijele Bosne i Hercegovine, kojom privredni subjekti INA-Industrija nafte d.d. Zagreb, Avenija Većeslava Holjevca 10, 10020 Zagreb, Republika Hrvatska i „Prvo Plinarsko Društvo“ d.o.o. Vukovar, Kardinala Alojzija Stepinca 27, 32000 Vukovar, Republika Hrvatska, kupovinom dionica stiču ¹(..)* udjela u osnovnom kapitalu privrednog subjekta „Petrokemija“ d.d. Aleje Vukovar 4, 44320 Kutina, Republika Hrvatska.
2. Ovo Rješenje je konačno i upisuje se u registar koncentracija.
3. Ovo Rješenje će biti objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 24.7.2018. godine pod brojem: UP-02-26-1-23-1/18, zaprimilo zajedničku Prijavu koncentracije (dalje u tekstu: Prijava), podnesenu od strane privrednih subjekata: INA-Industrija nafte d.d. Zagreb, Avenija Većeslava Holjevca 10, 10020 Zagreb, Republika Hrvatska (dalje u tekstu: INA ili podnosilac prijave) i „Prvo Plinarsko Društvo“ d.o.o. Vukovar, Kardinala Alojzija Stepinca 27, 32000 Vukovar, Republika Hrvatska (dalje u tekstu: PPD ili podnosilac prijave), koja se odnosi na sticanje (..)* udjela u osnovnom kapitalu privrednog subjekta Petrokemija d.d. Aleje Vukovar 4, 44320 Kutina, Republika Hrvatska (dalje u tekstu: Petrokemija).

Prijavu je, kao zastupnik privrednih subjekata INA i PPD, podnio advokat Sead Miljković, Vrazova br. 8, 71000 Sarajevo (dalje u tekstu: Podnosilac prijave).

Konkurencijsko vijeće je dana 5.9.2018. godine pod brojem UP-02-26-1-23-2/18, objavilo Obavijest o prijavi predmetne koncentracije u dnevnom listu Oslobođenje d.o.o. Sarajevo, te na web stranici Konkurencijskog vijeća i pozvalo sve zainteresirane strane na dostavljanje eventualnih primjedbi na istu. U okviru predviđenog roka nije zaprimljena niti jedna primjedba.

¹ Podaci predstavljaju poslovnu tajnu.

Nakon analize podnesene Prijave, Konkurencijsko vijeće je konstatovalo da je ista uredna i kompletna te je Podnosiocu prijave dana 17.9.2018. godine, pod brojem: UP-02-26-1-23-4/18, Podnosiocu prijave izdalo Potvrdu o prijemu kompletne i uredne prijave koncentracije, u smislu člana 30. stav (3) Zakona o konkurenciji („Službeni glasnik BiH“, br. 48/05, 76/07 i 80/09) (dalje u tekstu: Zakon).

Podnosilac prijave je u istoj naveo, u smislu člana 30. stav (2) Zakona, da ima namjeru podnošenja prijave predmetne koncentracije tijelima nadležnim za ocjenu iste izvan teritorije Bosne i Hercegovine i to u Crnoj Gori, Hrvatskoj, Srbiji i Albaniji, a Prijava je podnesena i Evropskoj komisiji.

Prijava namjere koncentracije je podnesena u smislu i u skladu s članom 16. stav (2) Zakona.

1. Učesnici predmetne koncentracije

Učesnici koncentracije po predmetnoj prijavi su privredni subjekti: INA-Industrija nafte d.d. Zagreb, Prvo Plinarsko Društvo d.o.o. Vukovar i Petrokemija d.d. Kutina.

1.1 Privredni subjekt „INA- INDUSTRIJA NAFTE“ d.d., kao kupac

Privredni subjekt „INA-Industrija nafte“ d.d., sa sjedištem u ul. Avenija Većeslava Holjevca 10, 10020 Zagreb, Republika Hrvatska, registrovan je u registru poslovnih subjekata kod nadležnog trgovačkog suda u Zagrebu pod brojem 080000604 i upisanim kapitalom od (..)*kuna.

Prema aktuelnom izvodu iz sudskog registra, INA je dioničarsko društvo čiji su najveći dioničari naftna kompanija MOL group, Október huszonharmadika u. 18., 1117 Budimpešta, Mađarska, sa (..)* vlasništva i Vlada Republike Hrvatske sa (..)*, a manji dio dionica se nalazi u vlasništvu privatnih i institucionalnih investitora u iznosu od (..)*.

Osnovna poslovna djelatnost privrednog subjekta INA jeste istraživanje i proizvodnja nafte i plina u Hrvatskoj i inostranstvu, prerada nafte i proizvodnja derivata u rafinerijama u Rijeci i Sisku, proizvodnja goriva te u Zagrebu proizvodnja maziva, maloprodaja derivata i drugih roba putem maloprodajne mreže, trgovina sirovom naftom i naftnim derivatima i nabavljanje i prodaja prirodnog plina (11.1 – vađenje sirove nafte i zemnog plina).

1.1.1 Povezana društva privrednog subjekta INA

Povezana društva odnosno privredni subjekti na teritoriji Bosne i Hercegovine, u kojima privredni subjekt INA, kao podnosilac prijave, ima udio u vlasništvu su sljedeća:

Tabela 1.

R.br	Naziv privrednog društva	Udio u %	Pretežna djelatnost
1.	Holdina d.o.o. Sarajevo	(..)*	(..)* Trgovina na veliko krutim, tečnim i plinovitim gorivima i srodnim proizvodima
2.	Energopetrol d.d. Sarajevo	(..)*	(..)* Trgovina na malo motornim gorivima u specijaliziranim prodavnicama
3.	INA BH d.d. Sarajevo	(..)*	(..)* Trgovina na veliko krutim, tečnim i plinovitim gorivima i srodnim proizvodima
4.	INA BL d.o.o. Banja Luka	(..)*	(..)* Trgovina na veliko krutim, tečnim i plinovitim gorivima i srodnim proizvodima
5.	TGA d.d. Stolac	(..)*	(..)* Proizvodnja proizvoda od žice, lanaca i opruga
6.	Crosco International d.o.o. Tuzla	(..)*	(..)* Nafta i geo servisi

Izvor: Podaci iz prijave i klasifikacija djelatnosti po KD BIH 2006 i 2010

Prema podacima iz Prijave, pojedina povezana društva privrednog subjekta INA u 2017. godini, nisu ostvarila prihod iz obavljanja osnovne djelatnosti, a neki od njih su ostvarili samo finansijski prihod od pozitivnih kursnih razlika i prodaje učinaka, što je vidljivo iz priloženih finansijskih izvještaja, a radi se o sljedećim društvima:

- INA BL d.o.o. Banja Luka,
- TGA d.d. Stolac,
- INA BH d.d. Sarajevo i
- Crosco Interational d.o.o. Tuzla.

Povezana društva privrednog subjekta INA, koja su aktivna i posluju na teritoriji Bosne i Hercegovine, a u 2017. godini, kao godini koja je prethodila prijavi predmetne koncentracije, ostvarili prihode iz osnovne djelatnosti su sljedeći privredni subjekti:

- „HOLDINA“ d.o.o. za posredništvo, vanjsku i unutrašnju trgovinu krutim, tekućim i plinovitim gorivima, Sarajevo i
- ENERGOPETROL d.d. Sarajevo.

Podnosilac prijave u istoj navodi da se niti jedno od povezanih društava ne bavi osnovnom djelatnošću koju obavljaju sam podnosilac, niti ciljano društvo predmetne koncentracije.

1.2 Privredni subjekt „ Prvo Plinarsko Društvo“ d.o.o., kao kupac

Prvo Plinarsko Društvo osnovano 2006. godine sa sjedištem u ulici Kardinala Alojzija Stepinca 27, 32000 Vukovar, Republika Hrvatska, upisan je u registru poslovnih subjekata kod nadležnog trgovačkog suda u Zagrebu pod brojem 030070559 i upisanim kapitalom od (..)*kuna.

Ovaj privredni subjekt je u (..)* vlasništvu privrednog subjekta Energia Naturalis d.o.o. Vukovar, sa sjedištem u ulici Kardinala Alojzija Stepinca 27, 32000 Vukovar, Republika Hrvatska, čiji je većinski vlasnik fizičko lice (..)*.

Osnovna registrovana djelatnost privrednog subjekta PPD jeste uvoz, skladištenje i prodaja prirodnog plina kao i opskrba i distribucija plina u Hrvatskoj (35.23- Trgovina plinom distribucijskom mrežom).

1.2.1 Povezana društva privrednog subjekta PPD Vukovar

Prvo Plinarsko Društvo d.o.o. Sarajevo

Privredni subjekt PPD ima (..)* kapitala u privrednom subjektu Prvo Plinarsko Društvo d.o.o. Sarajevo, Tešanjaska br. 24, 71000 Sarajevo, upisanom u registar privrednih subjekata kod Općinskog suda u Sarajevu pod matičnim brojem 65-01-0970-17, osnovano s ciljem bavljenja trgovinom i distribucijom nafte, naftnih derivata i ukapljenog naftnog plina na području Bosne i Hercegovine.

Navedeni privredni subjekat nije aktivan i ne obavlja nikakvu privrednu djelatnost na predmetnom relevantnom tržištu.

Erdal d.o.o. Sarajevo

Fizičko lice (..)*, većinski vlasnik društva Energia Naturalis d.o.o. Vukovar i privrednog subjekta PPD, je suvlasnik i većinski vlasnik u društvu Open Solutions Limited sa sjedištem na adresi Sir Adrian Dingli Street, Sliema SLM 1902, Malta. Društvo Open Solutions Limited je vlasnik (..)* društva Coast Line Commodities sa sjedištem na istoj adresi, a koje na području Bosne i Hercegovine u (..)*

vlasništvu ima registrovano društvo Erdal d.o.o. sa sjedištem na adresi Tešanjaska br. 24a, Sarajevo, registrovano u Općinskom sudu u Sarajevu, pod matičnim brojem: 65-01-0428-15 i upisanim kapitalom u iznosu od (..)*KM.

Navedeno društvo bavi se trgovinom berzanskom robom koja uključuje električnu energiju, LPG, naftne derivate, glinicu, aluminijske trupce, mineralna goriva i slično. Mineralna goriva kupuje od Petrokemije, a naftne derivate kupuje od INA-e.

1.3. Privredni subjekt „Terra mineralna gnojiva“ d.o.o. za savjetovanje i upravljanje, Zagreb, kao posrednik u predmetnoj kupovini

Privredni subjekt Terra mineralna gnojiva d.o.o. za savjetovanje i upravljanje sa sjedištem u ulici Savska cesta 41, Zagreb, Republika Hrvatska, upisano je u registar poslovnih subjekata kod nadležnog trgovačkog suda u Zagrebu pod brojem 081183189 i upisanim kapitalom od (..)*kuna.

Prema aktuelnom izvodu iz sudskog registra, Terra mineralna gnojiva su dioničarsko društvo čiji su dioničari INA i PPD u visini od po (..)* učešća u kapitalu.

Društvo je isključivo osnovano u svrhu sticanja dionica u privrednom subjektu Petrokemija, nema udjela u drugim privrednim društvima i tek započinje sa obavljanjem registrovane djelatnosti.

Osnovni predmet poslovanja privrednog subjekta Terra mineralna gnojiva jeste upravljačka djelatnost holding-društva, kupovina i prodaja robe, zastupanje inostranih firmi, obavljanje trgovačkog posredovanja na domaćem i inostranom tržištu (70 - Upravljačke djelatnosti, savjetovanje u vezi s upravljanjem).

1.4. Privredni subjekt „Petrokemija“ d.d. Kutina, kao ciljno društvo

Privredni subjekt Petrokemija d.d. sa sjedištem u ulici Aleje Vukovar 4, 44320 Kutina, Republika Hrvatska, upisan je u registar poslovnih subjekata kod nadležnog trgovačkog suda u Zagrebu pod brojem 080004355 i upisanim kapitalom od (..)*kuna.

Prema aktuelnom izvodu iz sudskog registra, Petrokemija je dioničarsko društvo čiji su najveći dioničari CERP/Republika Hrvatska sa (..)*, Splitska banka d.d./AZ OMF kategorije B - Skrbnički račun (..)*, Addiko Bank d.d./PBZ CO OMF- kategorija B- Skrbnički račun (..)*, Splitska banka d.d./Erste plavi OMF kategorije B- Skrbnički račun (..)*, HPB d.d./ Kapitalni fond d.d.- skrbnički račun (..)*, Privredna banka Zagreb d.d.- skrbnički račun (..)*, Splitska banka d.d./ OTP Uravnoteženi-OIF s javnom ponudom- Skrbnički račun (..)*, (..)*i ostali dioničari sa (..)*.

Osnovna djelatnost privrednog subjekta Petrokemija, jeste proizvodnja mineralnog gnojiva koje se koriste u primarnoj poljoprivrednoj proizvodnji (20.15- Proizvodnja gnojiva i dušičnih spojeva). U svrhu proizvodnje mineralnih gnojiva, Petrokemija koristi prirodni plin koji kupuje od strane privrednih subjekata INA-e i PPD-a.

Plasman svojih proizvoda u Bosnu i Hercegovinu, privredni subjekt Petrokemija obavlja organizirano putem distributera „Modeco“ d.o.o. Ljubuški, „Rapić“ d.o.o. Gradiška, dio prodaje ostvaruje u obliku „spot prodaje“, te putem direktne prodaje dugogodišnjim kupcima.

1.4.1 Povezani privredni subjekti ciljnog društva

Petrokemija kao ni bilo koje društvo koje pripada Petrokemiji nema povezanih društava na teritoriji Bosne i Hercegovine niti društava u kojima pojedinačno ili zajedno ima 10% ili više učešća u osnovnom kapitalu odnosno 10% više prava glasa.

2. Obaveza prijave koncentracije

Na osnovu člana 14. stav (1) Zakona, namjeravanu koncentraciju učesnici su u obavezi prijaviti ukoliko:

- a) ukupni godišnji prihod svih učesnika koncentracije ostvaren prodajom roba/usluga na svjetskom tržištu iznosi 100.000.000,00 KM po završnom računu iz godine koja je prethodila koncentraciji, i
- b) da ukupni godišnji prihod svakog od najmanje dva učesnika koncentracije ostvaren prodajom roba/usluga na tržištu Bosne i Hercegovine iznosi najmanje 8.000.000,00 KM u godini koja je prethodila koncentraciji, ili ukoliko je njihovo zajedničko tržišno učešće na relevantnom tržištu veće od 40%.

Ukupni godišnji prihodi privrednih subjekata učesnika predmetne koncentracije na dan 31. decembar 2017. godine iznosio je:

Tabela 2.

Red. br.	Naziv privrednog subjekta	Prihod ostvaren na tržištu BiH u KM	Prihod na svjetskom tržištu u KM
01.	INA	(..)*	(..)*
02.	PPD	(..)*	(..)*
03.	Petrokemija	(..)*	(..)*

Izvor: podaci iz Prijave

Prema prikazanim podacima iz Tabele 2., vidljivo je da su finansijski pragovi odnosno uslovi predviđeni članom 14. stav (1) tačka b) Zakona, pod kojim postoji obaveza prijave koncentracije ispunjeni, te je postojala obaveza prijave namjere koncentracije u smislu člana 16. stav (2) Zakona o konkurenciji, što je ispoštovano od strane Podnosioca prijave, odnosno Prijava dostavljena u propisanom roku.

3. Pravni osnov i oblik koncentracije

U podnesenoj Prijavi, podnosioci prijave kao pravni osnov predmetne koncentracije navode Odluku o povećanju osnovnog kapitala društva ulozima u novcu i izdavanju dionica uz isključenje prava prvenstva dioničara društva, donesenu od strane Glavne skupštine privrednog subjekta Petrokemija dana (..)*.

Naime, dana (..)* na glavnoj skupštini privrednog subjekta "Petrokemija" donesena je Odluka o povećanju osnovnog kapitala Društva ulozima u pravima i izdavanju dionica uz isključenje prava prvenstva dioničara društva i Odluka o povećanju osnovnog kapitala društva ulozima u novcu uz isključenje prava prvenstva dioničara i izmjenama Statuta Društva.

Privredni subjekti INA I PPD iskazali su namjeru učestvovanja u dokapitalizaciji privrednog subjekta Petrokemija te namjeravaju putem društva Terra mineralna gnojiva d.o.o. za savjetovanje i upravljanje Zagreb, steći (..)* učešća u privrednom subjektu Petrokemija.

Koncentracija se dakle odnosi na sticanje (..)* učešća u osnovnom kapitalu i sticanje kontrole nad privrednim subjektom Petrokemija od strane privrednih subjekata INA i Prvo Plinarsko Društvo.

Slijedom navedenog, pravni oblik predmetne koncentracije jeste sticanje kontrole nad privrednim subjektom, kupovinom većine dionica, u smislu odredbi člana 12. stav (1) tačka b) pod 1) Zakona.

4. Pravni okvir ocjene koncentracije

Konkurencijsko vijeće u postupku ocjene predmetne koncentracije primijenilo je odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 30/10).

Konkurencijsko vijeće, na osnovu člana 43. stav (7) Zakona, također je koristilo kriterije i standarde iz Obavijesti Evropske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

5. Relevantno tržište koncentracije

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge, koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda i/ili usluge pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Ciljno društvo predmetne koncentracije, kako je utvrđeno analizom priložene dokumentacije, bavi se proizvodnjom i prodajom mineralnih gnojiva koja se koriste u primarnoj poljoprivrednoj proizvodnji upotrebom prirodnih mineralnih sirovina, prirodnog plina, atmosferskog dušika i kisika, dok se sami podnosioci prijave primarno bave djelatnošću proizvodnje, prerade i distribucije nafte, naftnih prerađevina i plina, odnosno uvoza i prodaje plina, a svoju djelatnost u Bosni i Hercegovini obavljaju putem povezanih društava.

Kao relevantni proizvod određuje se prodaja mineralnih gnojiva koja se koriste u primarnoj poljoprivrednoj proizvodnji.

Kao geografsko tržište određuje se područje cijele Bosne i Hercegovine, uzimajući u obzir područje djelovanja ciljnog društva, odnosno privrednog subjekta Petrokemija, kao društva nad kojim se stiče kontrola predmetnom koncentracijom.

Slijedom navedenog, a u skladu s članom 3. Zakona, te čl. 4. i 5. Odluke o utvrđivanju relevantnog tržišta, relevantnim tržištem predmetne koncentracije smatra se tržište prodaje mineralnih gnojiva na cijeloj teritoriji Bosne i Hercegovine.

6. Analiza relevantnog tržišta i tržišnog učešća

Podnosilac prijave dostavio je Konkurencijskom vijeću procjenu tržišnog udjela ciljnog društva predmetne koncentracije i njegovih konkurenata na relevantnom tržištu u 2017. godini:

Tabela 3.

Red.br	Naziv privrednog subjekta	Tržišni udio u %
01.	Petrokemija dd Kutina	(..)*
02.	Global Ispat Koksna Industrija d.o.o. Lukavac	(..)*
03.	Promist d.o.o. Novi Sad	(..)*
04.	Elixir, Novi Sad	(..)*
05.	Borealis L.A.T d.o.o. Novi Beograd	(..)*
06.	Adriatica d.o.o. Vukovar	(..)*
07.	Ostali	(..)*
	Ukupno:	(..)*

Izvor: Podaci iz prijave

Prema podacima prikazanim u Tabeli 3., vidljivo je da Petrokemija kao ciljno društvo predmetne koncentracije na relevantnom tržištu Bosne i Hercegovine ima visoko tržišno učešće od (..)* i vodeći je učesnik na istom. Ostali konkurenti imaju tržišno učešće u rasponu od (..)*, a ukupan broj učesnika na ovom relevantnom tržištu nije veći od (..)*.

7. Ocjena predmetne koncentracije

Na osnovu kriterija utvrđenih članom 17. Zakona, Konkurencijsko vijeće je ocijenilo efekte predmetne koncentracije, analiziralo uticaje istih na strukturu relevantnog tržišta kao i da li će predmetna koncentracija stvoriti dominantan položaj Podnosioca prijave, koji bi za posljedicu imao značajno narušavanje efikasne tržišne konkurencije, u smislu člana 13. Zakona o konkurenciji, odnosno da li će ista proizvesti pozitivne efekte koji se ogledaju u jačanju postojeće konkurencije na relevantnom tržištu.

Konkurencijsko vijeće je u toku razmatranja predmetne koncentracije prikupilo potrebne podatke od podnosioca prijave, te na osnovu istih procijenilo da na relevantnom tržištu postoji izvjestan broj konkurenata što je pretpostavka djelovanja slobodne konkurencije, te analizom relevantnog tržišta u smislu člana 17. Zakona, ocijenilo da ne postoje pravne i druge zapreke za ulazak drugih privrednih subjekata na relevantno tržište.

Također je utvrđeno da Podnosioci predmetne prijave niti jedno od njihovih povezanih društava ne djeluje na tržištu na kom ciljno društvo obavlja svoju osnovnu djelatnost, što znači da bi nakon provođenja predmetne koncentracije stanje na relevantnom tržištu ostalo nepromijenjeno u smislu tržišnog udjela ciljnog društva, odnosno provođenjem predmetne koncentracije neće doći do isključenja konkurencije niti do eventualnog slabljenja funkcionisanja slobodne tržišne konkurencije na predmetnom relevantnom tržištu, odnosno da predmetna koncentracija ne sprječava, ograničava niti narušava tržišnu konkurenciju na relevantnom tržištu.

Podnosilac prijave u istoj obrazlaže da namjeravana koncentracija prvenstveno predstavlja komercijalnu i stratešku saradnju sa ciljnim društvom, u smislu da će dokapitalizacija dovesti do restrukturiranja i stabilizacije poslovanja privrednog subjekta Petrokemija, obzirom da isto u proteklih nekoliko godina posluje sa velikim gubicima i ima dug od cca. (..)* miliona kuna. Restrukturiranje treba donijeti, kako planiraju podnosioci predmetne prijave, poboljšanje proizvodnog portfelja, postizanje održivog nivoa troškova poslovanja, optimizaciju radne snage i obrtnog kapitala, vanjsko refinansiranje i sl.

S aspekta potrošača, podnosioci predmetne prijave smatraju da će koncentracija dovesti do pogodnosti u vidu snižavanja cijena proizvoda, te povećanja produktivnosti i kvaliteta proizvoda.

Konkurencijsko vijeće je uzimajući u obzir iznesene činjenice i podatke, ocijenilo predmetnu koncentraciju dopuštenom, u smislu člana 18. stav (2) tačka a) Zakona te donijelo odluku kao u dispozitivu ovoga Rješenja.

8. Administrativna taksa

Podnosilac prijave u skladu s članom 2. tarifni broj 107. stav (1) tačka d) pod 1) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", br. 30/06 i 18/11), dužan je platiti administrativnu taksu na ovo Rješenje u iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednica

Adisa Begić

Dostaviti:

- Podnosiocu prijave po punomoćniku i
- u spis.